

کمال زاده علی اکرم

# روح کمال

وقف ایلدم وجودی بن راه ملتہ ،  
بذل ایلدم حیاتی فکر حمیتہ ؟  
جسم عدمده اولسده خونم یونار سنی ،  
ویرم بحال بن سکا خلقه خیانتہ !  
« کمال »



استانبول  
محمود بك مطبعه سی

۱۳۲۴





## پدرم مرحوم کمالک روحنه

باباجغم، عثمانلیلرک استقبالنندن سن، آنجق سن  
براطمشان قهرمانانه ایله هر زمان امین ایدک. یالکیز  
مسلك حمیتکده دکل، اعتقاد وجدانکدهده کائناتک  
رغمه منفرد قالمشدک. «برکون کله جک بزم وطنمزدهده  
ملت حاکم، حریت پادشاه اوله جق!» دیین سن  
دکلیسک؟ «بوملکستده انقلاب روم ایلیدن ظهور  
ایدر» حکمی ویرن سن دکلیسک؟ ایشته کرامت  
وجدانک ظهور ایتدی. ایشته پرستیده روانک،  
معشوقه جنانک اولان ملکه حریت روم ایلیدن عرض  
دیدار ایلدی. او اله المعالینک انجلای چهره قدسیتیه  
آفاق وطنه کونشیر عکس ایدیورنجه هر کونشک  
علویت مغویه سندن انظار ملته سنک جبهه بلند حمیتک  
اوردی. بتون عثمانلیلر سنک ابدی نام محترمکی تجیل  
وتقدیس ایدیور. بو جهان جوشا جوش حریت  
وسعادت وحمیت اتفاق آرای ملته، اجماع امتله سنکدر،  
هپ سنکدر؛ هپ سنک تلب مبارککه الهام اوانسان



فیوض السیه نك آنا یدر . بن ده سنكم ، سوزلرم ده  
 سنگدر . اوت ، سوزلرم سنك فیوض الهامك ، سنك  
 سانحات علویات وجدانكدر . سوزلرم عیناً سنك  
 فكرك ، سنك روحكدر باباجم ! الفاظ بشریتك اك  
 بیوكلرندن اولان « حریت » كلمه سی سنك او  
 قدسیت شعار وابدی الاشتهار اولان نام علویتكله  
 توأم اوله رق قلوب داغدار ملتدن ۱۱ تموز سنه ۳۲۴  
 تاریخنده فوران ایتدی . ایشه بن ده او کوندن  
 بری یازدیغم ، سویلدیكم شیلری طویلادم ؛ فرقت  
 ابدیه گدن ، شهادت فجیعه گدن زار زار هجران اولان  
 قلب مجروحمه — دها اومقدس قبر وطن هیبت ،  
 اوقبر حریت عظمتكك حضور جلانده بولندیغم  
 صیره ده — الهام ایلמש اولدیغك مرثیه بی ده بوکونکی  
 نشاید وجدانمه مقدمه اتخاذا ایتدم ؛ بورساله یاخود بو  
 داستان کمال وجوده کلدی . رساله بی نام حقیقی سیله  
 « روح کمال » تسمیه ایلدم . انرمی ملیت شعار وحمیت  
 وقار اولان نام بلند ابدیتكه اتحاف ایدیورم . روحم  
 برج اقبال وشهامت روانكه طوغرو پرواز ایدوبده  
 وجودم کنسار مزاركه التحاق ایدنجه یه قدر فیوض  
 ازلیه عرفانگدن قلبمه الهام اولنه جق آتارك ....  
 بوندن صوکره — آه ای روح پرستشکار ازلی  
 وطن ! — بوندن صوکره فسختزار وطنك آفاق

نوّار سعادت و اقبالندن طلوع ایدہ جک الواح خوارق  
 آریانیہی مصور اولہرق قلمہ آلہ جغم، ملتک شو جوش  
 و خروش سعادتی آرہ سندنہ عادتایاز مقدمہ مضطر قالہ جغم  
 بیکلر جہ داستان فیضا فیض سرور و افتخارک بو رسالہ  
 بر مقدمہ مبرورہ حقایق مداری، اولین چہرہ انفلاق  
 علویت باری در . سطرلرینہ، دراک آسمان اولان  
 فکر نقّاد ادب و حکمتکله دکل، دہا اون بش اون  
 الی یاشلرنده بولندیغم زمانلر بیله کندی اشعار مخلدہک  
 حقندہکی تنقیداتی دیکیلہ جک قدر انصاف علویت  
 بیان و نوازش قدسی جان ابراز ایدن شیمہ عفو  
 و لطف ابوتکله نکاه انداز مرحمت اول ! فیوض  
 الہاماتکله انجق کندی قلمک شایان ایدی، حیفاکہ  
 او خامہ قدرتی آہنین پنچہ استبداد قیردی، پارچہ لادی؛  
 ملتک شو عیداکبر مسعودیتنی سن کورملی ایدک؛  
 حیف صدحیف کہ سن حریتک طلوعنہ انجق روحکله  
 نکران اولاییلورسک ! او مبارک روح مجروحک  
 شمدی نورلر ایچندہ پران اولیور. مقام شہادت انسام  
 حمیت و قدرتکله بتون عثمانیلر نصب نکاه ایتمش؛ اوج  
 اقبال شہادت واجلالنگدہ انظار ملتدن شفق رنگ  
 و آسمان آرا ہالہلر، نور انور سعادت و مفخرت لوحہلر  
 آجیلیور. ایشته اوغلک اکرمده او عالم ضیاباش علیمین  
 مرتبتکله شو اثریلہ کلدی؛ سکا سنی، سنک روحکی

کتیردی . اوغلکی ده پرستشکارانک اولان احرار  
 امتله برابر حضور حمیت و عرفانکه قبول ایت ! روان  
 مقدس کالکه هزاران فاتحه احترام و اشتیاق عرض  
 ایدرم ؛ خاک پاک مبارککه یوزمی کوزمی سوره رم  
 باباجغم !

کمال زاده

ردوس فی ۳ ایلول سنه ۳۲۴

علی اکرم







## بابا جغمه سويلديكم مرثيه در

— ۱ —

ای پنجه سنده جان از یلین شیر خونفشان !  
ای تیغی عمری پاره لین موت بی امان !  
سندن بکا توارد ایدن یأس و محنتی  
وجدانم اولسه اکلایه ماز کیمسه بر زمان ،  
کوکلمده کی کدورتی بالله سويلمز  
وحی جلیل حقه سوزم اولسه ترجمان ؛  
فریاد و آهه قالماسه کوکلمده اقتدار ،  
درک ایتمز اولسه وارلغمی عقل ناتوان ،  
بن قلبی یأس الیله یرندن سوکوب ینه  
جانکاهه منعطف المه ایلرم نشان !  
اللهه جانمی ویره رک فکر الیرده بن  
مدهش حقیقتی بولورم حق قدر عیان !  
اولسه مده ناله ام ایرمیه جک منتهاسنه :  
روحم حزین حزین ایده جک تا ابد فغان !  
هرکس جهانده شدتکه اوغرار ای اجل ،  
بن اوغرامد خیانتکه ای عدوی جان :  
شمشیر ظامی یاره لی برقلبه صاپلادک  
اولدی بابام بیوکلمکنه طویمدن جهان !

بر رکن اعظمی ییقیلوب آدمیتک ،  
کوجدی بوکون ولی حقیقتی امتک !

## — ۲ —

حقا که بروی ایدک ای اکمل انام ،  
 اما حمیت اولمش ایدی مرشدک مدام :  
 حریتی ، عدالتی ، شان حمیتی  
 هریرده دایما ایدرک مبدأ کلام  
 احیایه فکرینی شو صغوق قانلی ملتک  
 افنای جسم و جان ایله ایلردک اهتمام ؛  
 کوستردیکک طریق سلامتده شوق ایله ،  
 زنجیر ظلمه باغلی ایکن ایلدک دوام ؛  
 برکیمسه اولمامشدی سکا بزده مقتدا ،  
 نور آلامدن کونش کی صاچدک ضیای تام ؛  
 براویله ذوالفقار ایدی دستکده خامه کیم [\*]  
 قان آغلادجقه ایلدی ملیت ابتسام !  
 قولکله فعلک ایتمدی بر کره اختلاف ،  
 نامک کی کمال ایدک ای شاعر بنام .  
 کیم کورسه وجه پاکی حیران اولوب سکا ،  
 تاجان اوندن ایلر ایدی عرض احترام ،  
 کیم دیکلیدیسه نطقکی مفتون اولوب دیدی :  
 البت بوکون شوامت ایچون ذاتیدر امام .  
 ایواه غائب اولدی نظرلردن اول وجود ،  
 شمعی سمانن ایلایور اجداد آکا سجود !

[\*] مرحوم اکثریت اوزره لعل ایله یازی یازاردی .



## — ۳ —

قارشیمده کیمدر ایکلیه رک جان ویرن خیال ؟  
 آغوشنه وجود آرایان جسم بی مجال ؟  
 کیمدر شو رنکی کل کبی صولمش طونوق قر ؟  
 کیمدر شور و حی وجهنه کلش اوچوق جمال ؟

آلهی ، ملتی آکیور شوق ایله مدام ، [\*]  
 محصول عمرینی صورار اما لسان حال .

اولادینک محبتی اولمش ده بر ملک ،  
 طورمش باشنده رحلتنه ویرمز احتمال !

معنا فندن آغلایه رق عرشه اوچمه ده ؛  
 روحیله خالقه کیده جک جانلی برمال !  
 بر بویله آنلی شانلی شهید مقدسک

روح نبییه موتی اولور باعث ملال !  
 کیمدر بوشان و حزنک ایچنده یاتان وجود  
 کیم رفته رفته جان غیری بولور زوال ؟  
 نور ازمیدرکه قیلار اصلنه رجوع ؟  
 یا فکر حقمیدرکه ایدر عرشه انتقال ؟  
 مطلق بو برحیات ابددرکه منقلب :

انسان بورتبه عزت ایله ایتمز ارتحال.....

سندک اوکوردیکم متالم خیال آه ،  
 ای محترم پدر ، نیچون اولمقده سک تباه ؟

[\*] مرحوم : لاهنه قاووشدینی زمان بریزر یاننده بولنه ماشدق .

— ۴ —

سنسك يته بيان ايده جك سريكي بكا ،  
 اي مظهر حقايق پر نور كبريا !  
 الله ايچون حقيقتكي ايله آشكار ،  
 يوكسلمكه بورتبه نه دن ايتدك ابتلا ؟  
 جنتده امتك شهداسي وجوديكي  
 تقدیس ايچون وصولكه مي ايتمه ده دعا ؟  
 تبشير ايچون جناني محمدی منتظر ؟  
 يوقسه سكا جماليمي وعد ايدر خدا ؟  
 علويت مخيلهك اولمش ده بر كونش  
 كويا كه روحكي چكيور عرشه دائما ؛  
 يا بر اله عشق ايدرك جنتي مقرر ،  
 تصوير حسنى قلمكدن قيلار رجا ؛  
 يا قانلي قوينكي آچهرق سوديكك وطن ،  
 ايلر سنى حياته عدو ، عاشق بقا .  
 الله ايچون نكاهكي حصر ايمه مادره ،  
 اولادكي اونوتمه كه دنيا ده هر صفا  
 سنسك بزه ؛ سونرسه ضياي ابوتك ،  
 بالله روحمز قرارير جان ايدر بكا !  
 سن مالك حياتكه ايلرسهك اتصال ،  
 بزجه وصال خالق وجدان اولور محال .

## — ۵ —

کیتیمکسه مطلقا املک نژد عزته [\*]  
 آل باری قوینکه کیده لم بزده جنته ؛  
 لایق کوروبده جسمی بر قانلی مرقدہ ،  
 بنسز روای جانکی ویرمک شوملته ؟  
 لایقی سنجہ مادرہ قربان اولان قیزک  
 دوشسون ، هزاره عاشق اولوب ، ناز فرقتہ ؟  
 ایتسک بقا یولنده آتی کندیکہ رفیق ،  
 احفادیکی آلبرده قوشار اول سعادتہ .  
 ممکن دکل شہادت ایله خالقہ وصول :  
 خلق ایلش مذلتی ترجیح رحلتہ !  
 سن باری آلده قوینکه اصعاد قیل بزى  
 شانکله رحلت ایلدیکک اوج رفعتہ .  
 برکعبہ اولسہده وطنک هر دیاری آہ ،  
 سنسز شرف غروب ایدر امواج ظلمتہ .  
 ایواہ اویلہ کوکلکی طوتمش که سیرتک ،  
 ظن ایلرم که سن سبب اولدک شو صورتہ !  
 سندن بیلیر ممانکی بیچارہ کوکلم آہ :  
 فکرم سنکله واصل اولور هر حقیقتہ .  
 یوق ، یوق ، کوزمدن ایلدک کندک اختفا  
 مولاده آلمادی ، سنی ظلم ایلدی هبا !

[\*] بوندى آکلامق مرحومک شو شعرینی بیلککه متوققدر :

نینه ، قویشکدن او یورکن چیقدم ،  
 کلدم اما بوجهانہ بیقدم  
 برقیزم وار ، سکا قربان اولسون ،  
 اوغلمک مرقدی آل قان اولسون ،

بوده عثمانلیلره شان اولسون !  
 سن کیدرسک ینہ کیتمز شرفک ،  
 آ وطن کعبه میدر هر طرفک .



## — ۶ —

درك ايلين حقيقتنى رب العالمين  
 وهم ايلمز كه ايتدى سنى طوبراغه دفين :  
 دنياده حقه لازم ايدى جسم اقدسك ،  
 طغيان سيل ظلمه ايدك سد آهين !  
 اويله خروشه كلدى فقط بحر ظلم كيم  
 امواجى قانلى براولور دريا اولوب زمين ،  
 هر طالغهدن اتده بر آتشلى سيف ايله ،  
 انسان قياقتده ظهور ايتدى بيك لعين !  
 هپ محويكه تهالك ايله ايتديلر هجوم ،  
 بيك ياره آچدى سينه كه هر سيف آتشرين .  
 قالدك يكانه حامى علويت وطن ،  
 اما ينه متين ايدك اى قهرمان دين !  
 ملت كه جسم وجانكى وقف ايتدك اوغرينه ،  
 ملت كه نام وشاتى سن ايلدك نوين ،  
 باقدى كمال راحت ايله اضطرابكه ،  
 بر كيمسه شانلى صولتكه اولمادى معين !  
 دوشدك نهايت ايلدى اعدا سنى تراب ،  
 حيفا كه جسمك اولمادى قلبك قدر متين .  
 دستكده پاره پاره اولوب طوتديغك علم  
 بر شعرك اولدى موتك ايله خا كه مر تسم [\*]

[\*] طوتدى بر قطعه ي آقان قانك  
 چاك چاك اولدى خير برانك

بايراغك ياره لندى دوشدى يره

اولدى هر ياره سى جهان يره

بوميدر روز مشرك شانى

اى مه آسمان عثمانى

نه مهاتلى انشقاقك وار !

## — ۷ —

دنیاده نام وشانکی یازدقجه هر قلم ،  
 اصحاب ظلمی لغت ایله یاد ایدر ام .  
 لغت سنی هلاک ایدن اهل جهنمه !  
 اولدقجه شانلی مسکنک اول قبر محترم .  
 بیت خدای قابلا دی مظلوم قانلری ،  
 خیل عدو مساجده هپ باصدی ده قدم  
 برنبذه همت ایتدی ملک اعظمی ،  
 کیتدی وطن ده کلدی برکیمسه یه الم ؛  
 افنا ایچون اذا ایله اما وجودیکی  
 شیر دلیره بکزه دی هر بانی ستم !  
 بونلر یزیدی کچدی شناعته ایلرم  
 کندجه بشقه بیلدیکم الله بیک قسم !  
 احیای دینه خادم ایکن فکر اقدسک ،  
 عد ایتدیلر دیانتکی هادم حرم ؛  
 لغت سنی شهید ایدن ارباب ذلته ،  
 اولدقجه سوزلرک فلیکه ناشر حکم !  
 بالله کوکده موتکه ارواح آغلادی ،  
 اولدک اورتبه محنت ایله ای نبی شیم .

هر قطره کیم سمان ایدر قبریکه نزول ،  
 بر آه اولورده تاملکوته بولور وصول !

## — ۸ —

بر صبحدم که کوك يوزى پر اغبار ایدی ،  
 کوکلم کي فلک ده اوکون زار زار ایدی ؛  
 کوکدن ملککرك طوییلوردی فغانلری ،  
 یرده شهید ایکلیدیلى اشکبار ایدی ؛  
 بر ساحله بش اون نفر ایتشدی اجتماع ،  
 هر عسکرك يوزنده الم برقرار ایدی .  
 تابوتی قورشونه صاریلی بر جنازه آه ، [\*]  
 اول ارلر آرقه سنده اوکون اشکار ایدی .  
 علویت ومهابت وصافیت وکمال  
 هم جانلیلرده هم اولوده تابدار ایدی !  
 آلاى پروقار حمیت که زینتی  
 تابوت شام رنگ وسما اعتبار ایدی ؛  
 قورشونده شعله شعله طوران نور آفتاب  
 کویا سماده انجم پرتو نثار ایدی ؛  
 کویا که برجهاى کوه ایلردی اعتلا ،  
 یا براديب واصل خاک مزار ایدی ؛  
 قان آغلا یوردی قلب حزين وطن اوکون :  
 عکس شفقله روی زمین لاله زار ایدی ....

حقا که دوشدی شانکه لایق شو رحلتک ،  
 ای محترم پدر ، نه بیو کدر شهادتک !

[\*] مرحوم اولاساقزده دفن اولنوب مؤخرأ بولایره نقل  
 ایدلدیکندن تابوتک اوزرینه هکیلر قورشون واردیرمشلر ایدی .



## — ۹ —

کویدن چو جقار ایتش ایدی راهنه شتاب ،  
 معصوم چوقی ایلسه مظلومه انجذاب ؟  
 صاقد قجه شمه باد صبا هر شکوفه دن  
 ایصال ایدردی روحنه سوزشلی بر جواب .  
 عسکر ، چو جق ، چیچکله محاط اولدی اول ادیب ،  
 آلائی صانکه ایتش ایدی کنندی اتخاب !  
 وقتا که قرب مدفنه کلدی بوشان ایله ، [\*]  
 برصوت آمر ایلدی بر فرقه یه خطاب ؛  
 انسان سسی دکل ، او ندای خدا ایدی  
 کیم آسمانه عکس ایدرک ویردی انقلاب !  
 عسکر سلامه طور دی ، مکافات قابنی  
 بولدی بوصول سلام ایله اول مقدر تماب .  
 عسکر دکل سلامه طوران ، اول سلام ایله  
 عثمانایلقدی ایلین اعلان اضطراب !  
 مطلق بو رتبه حزن ومهاتبه ایلمز ،  
 بر لحظه ده قرله غروب ایتسه آفتاب ؛  
 بیلم فقط نصل ایدیور نور حق غروب ،  
 بیلم نصل کمال اوایور بر آوج تراب !  
 حیفا که بیلمامک یاشادیر آدمیتی ،  
 مقبردر آدمک واز اینسه بر حقیقتی !

[\*] بولارده سلیمان پاشا تر به سنک ادرکنه بر بلوک عسکر  
 دیزلش و مرحومک نعش مبارکنی تر به قیوسی ادرکنه کلنجه سلاملاش  
 ایدی .

## — ۱۰ —

ای نور حق مهبط اولان محترم مزار ،  
ای ملئت کمالی حاوی اولان دیار !  
حافظتک اول وجودی کیم اولمشدی عاشقک  
ایتدی وطن، وطن دیه آغوشک اختیار.  
تزیید عز و شانک ایچون کلدی قوینکه ،  
اللهه ایلسهک یاقیشیر عرض افتخار !  
بندن فقط اوجسم مبارک دکل جدا ،  
یالکیز سنک دکل ، بکا کوسترمه اغترار :  
بن آغلادقجه کریه می کوزدن قاپار نسیم ،  
ایلر سحر سحابی ایله خاککه نثار ؛  
آه ایلدکجه قلب غرییم ، ترا بکه  
کوکن حزین حزین دوکیلور رنک اغبرار ؛  
بلبل قیافتنده کایر هر سحر سکا  
روح غرییم آغلار، ایدر موتی شرمسار.  
ای سجده کاه فکر وادب ، ظلمتک سنک  
اصحاب فهمه نور خدا ایلر آشکار .  
ای کعبه جهان حمیت ! بوکون سنک  
آغوش شفقتکده یاتان شمس اقتدار  
حقک سکا امانتیدر مصطفای کبی  
محشرده امتی اوله جق انبیا کبی !

## — ۱۱ —

موتا دکل ، اوقبره کیرن آنلی بر شهید ،  
 اولمش حمیت اوغرینه وجدانلی بر شهید !  
 کوکسنده یوقسه قانلری ، آلنده پارلایور  
 علوتی ؛ کورنجه دینور : شانلی بر شهید .  
 افکاری نور اولورده بوکون قبرینه دوشر  
 بر چوق شهیده حجت رجحانلی بر شهید !  
 اولدی ، فقط وجودینی خلق ایتدی ملتک ؛  
 برکعبه قیلدی قبرینی عرفانلی بر شهید .  
 الله یولنده جاننی بذل ایتدی امته ،  
 اسلامه ، دینه پک بیوک ایمانلی بر شهید .  
 کیتدی خدایه ماتی مسعود کورمدن  
 وجدانی یاره لی ، یورکی قانلی بر شهید .  
 بولدی جهانده شمدی اک علوی مقامنی : [\*]  
 اولدی رفیق اکا ابداً شانلی بر شهید .  
 وجداننه اورتبه امین اولدی نفسی کیم [\*\*]  
 دنیاده کندینه دیر ایدی جانلی بر شهید .  
 ماهیتی حمیت ایدی ، فکری حب حق ؛  
 معشوقی خامه ، فطرتی عثمانلی بر شهید !

محشرده خامه یه طاقه رق قانلی بر کفن ،

سنباق یاپارده جنت ایچنده بولور وطن !

[\*] مقصد سلیمان پاشادر .

[\*\*] « نه دولندر شهید ذی حیات اولق بو دنیاده »  
 مرحومک بر مصرعیدر .



## — ۱۲ —

ایواه کیتدی ، عالم قدسیت آغلاسون ،  
 شمدی جهانده شعر و ادب ، حکمت آغلاسون !  
 ایواه اولدی ، موتنه کوکلم کبی مدام  
 هر صاحب فضیلت و اهلیت آغلاسون !  
 شمدی وطنده نامی ده محو اولدی کندینک  
 نام کمالی یاد ایله حریت آغلاسون !  
 روح سعادت اولدیکنی ایلسون ده یاد ،  
 محتلی آغلاسون اکا بی محنت آغلاسون !  
 مدهش کوروب حیاتی اطفال ملتک  
 هر مادرك دلنده بوکون شفقت آغلاسون !  
 اطرافنی عدوایله فرض ایلسون محاط ،  
 هر دخترک یوزنده بوکون عصمت آغلاسون !  
 ملتده یوقسه آغلایه جق اول ادیب ایچون  
 جتته غملی موتنه بر امت آغلاسون !  
 برکون آنجه نامنی ملت ، اذا ایله  
 احساسنه سوزنده کی علویت آغلاسون !  
 دست مؤید کدن اولوب تا ابد جدا ،  
 بیچاره قالدی هر قلم همت آغلاسون !

خاموش ای قلم که کمالی ایدر بیان  
 آنجیق یینه اوخامه دراک آسمان .

۱ نیشان ۱۳۰۵





## عثمانی اتحاد و ترقی جمعیتی مرکزینہ

قدس : ۲۸ تموز ۳۲۴

ملکک اک ہجرا برکوشہ سنده ، قدسده بولندیغ  
ایچون عصر غزتہ سنک - ۱۴۱ تموز سنہ ۳۲۴ تاریخلی  
نسخہ سنی دها بوکون کورہ بیلدم . شہادت قانلرینک  
تصلبندن وجود بولش قدر علوی ومقدس اولان  
لوای حریتی کھکشان ییلدیزلرینک آغوشنه قدر  
نصل اعلا ایتدیکنکزی تفصیلاتیلہ بیلہ میوردم . اولوای  
نور انوری ، عثمانیلرک ماضیدہ کی شان واجلالی ، ملتک  
مستقبلده کی فیض و اقبالی قدر پارلاق بر برج ابدی  
الاشتہار حریت واستقلالہ ، تاعرش اعلاده اوچوشان  
ملککک قنادلریلہ مصافحه ایدہ جک بر اوج کمالہ  
ایصال ایتمشکنز .

ای احرار ملت ، ای عثمانیلر ! ای وطنک  
اک معزز ومحترم اولادی اولان عسکرلر ! سزی  
مرحوم پدرم کمالک فکر و روان وجانمہ مؤبدأ  
یرلشدیرلش اولدیغی وطن محبتک اکصمیمی اکمتہیسیج  
اک روحپرور اکعلوی اشتیاقلری ارہ سنده غزتہ کزک  
مداد قدسی حریتلہ یازلش سطور نورینی کورہ میہ جک

قدر آغلادیغم بتون طمارلر مده کی خون حمیتی نسخه  
 طلاق آرایانه حریتکنزک صحائف مبارکه سنه کوز  
 یاشلریله اساله ایده جک قدر آغلادیغم بر صروده ،  
 روحک شمدی شودقیقه وجودمدن آریله رق مصر  
 حدودی جوارندن، قدسدن تابولایره قدر اوچوبده  
 اوراده کعبه عثمانیان اولان قبر کماله دوشدیکنی ،  
 اونک خاک مبارکنه یابیشدیغنی حس ایتدیکم روحک  
 بتون صمیمیت وانجذاب وتقدير ومفخرتيله تبریک  
 ایدرم .

غزاکز ، غزای اکبر حریتکنز جمله کزه ،  
 جمله مزه مبارک اولسون . وطنی بر موت محققدن  
 قورتاردیکز . عثمانلیغنی ، مزارینک باش اوچنه کلش  
 ایکن احیا ایتدیکنز . آسمان تاریخ انسانیتده ، آفاق  
 ماضیدن مدارج آتی یه لوامع فشان اولان کهکشانلر  
 آره سنبده کهکشان حریتمزده امین اولکنز که اک  
 مکوکب ، اک مشعشع ، اک فکر آشوب ، اک روحپرور  
 مناهج سلامت ونجات وسعاده مظهر اولمشدر ،  
 واوله جقدر .

وقف ایلدم وجودیمی بن راه ملتیه ،  
 بذل ایلدم حیاتی فکر حمیتیه ؛  
 جسم عدمده اولسه ده خونم بوغار سنی ،  
 ویرم مجال بن سکا خلقه خیانتیه !

قطعه بلاغت آفرین حمیتک قائل اولان کمال مکر



نه قدر دور اندیش بر صاحب نظر حکمت ، نه قدر متین  
 وموقر بر بانی حمیت ، ناصل مدقق وحکیم بر واقف  
 روح ملت ایمش ! اوت ایشته لسان درایت حریتکزده  
 ظالمیری کمالک خون حمیتله بوغدیکنز . اوت ، ایشته  
 لسان جلادت حریتکزده کمالک نام علویسی جنان  
 فضیلت وحمیتکزده اونک فیض والهام قدسیسی  
 بولندیغی حالده ظلم واستبدادی زیر وزبر ایتدیکنز .  
 امین اولیکنزکه ، شو غزای مبرور عثمانیان ، شو  
 عالی موفقیت ملت :

اولورسه کورمدن ملتده امید ایتدیکم فیضی  
 یازلسون سنک قبرمده وطن محزون بن محزون

دین کمالک ، او شهید حمیتک عظام پاره جسمنی  
 قبرنده تترتمشدر . فقط ای احرار ملت ، ای جماعت  
 کبرای حریت ؛ مقتدای عرفانکز ، پرستیده  
 وجدانکز اولان کمالک روحنی شاد ایتمک ایسترمیسکنز ؟  
 اونک نام ابدیسنه قارشو حس ایتدیکنکز حرمت  
 بی نهایتی بتون افعال وحرکاتکزله اعلان ایتمک ایستر-  
 میسکنز ؟ کمالک مسالک حمیتنی ، بندن ، اوغلندن  
 اوکره نیکزده اثر جلیله دائما اقتفا ایدیکنز : بابام  
 دولت وملت عثمانیه نک سعادتتی ، حیاتی خاندان  
 سلطنتله قائم بیلردی . خاندان سلطنته قارشی لایتغیر  
 بر حس حرمت بسلردی . پادشاهمز افندمره

کوستردیککز حرمت و رعایت مرحومك بو اعتقاد  
قویمنه تماماً مطابقدر. شان ابدیت نشان حریته الحق  
لایقدر. دائماً بومسلکی تعقیب ایدیکز، دائماً پادشاهمز  
محترم و معزز و موقر اولسون .

برده ، ای سیوف جلادت عثمانیانی بازوی حمیتله  
طاشیان ، نام بلند حریتی او قلیجلرك اوجیله صحیفه  
آسمانه یازان قهرمان عسکرلر ! ای عثمانلی ادبیاتی ،  
عثمانلی شعرینی عین سیادت اولان خدمت ملتہ وقف  
ایدرك بوکون اولاد وطنك تربیه فکریه و وجدان  
نیه‌سنی درعهده ایلمش بولسان محررلر ! ای شبان  
معرفت ، ای افراد حمیت ، ای عثمانیلر ، قان دوکیکز !  
قان دوکمکدن جداً فوق‌العاده اجتناب ایدیکز . بابام  
قاندن چوق متفرایدی . فرانسه اختلالنه دائر  
آناری برابر مطالعه ایتدیکمز زمانلر قانلی صحیفه‌لره  
کلدکجه کندی خون حمیتی بردن بره قلبنه چکیلیر ،  
هر زمان برعثمانلی بایراغنك انعکاس تموجاتندن حصول  
بولمش قدر روح استیناس بر احرار ایچنده بولسان  
او مبارک چهره‌سی کفن رنگی باغلاردی . بکا قان  
دوگولمکدن طولایی او قانی دوکنلرك کندیلرینه  
حتی بتون افراد ملتہ ترتب و توارث ایدن مهالك  
و مصائبی ساعتلرجه آکلادیر ، آغلایه‌رق سویلردی .  
برملتک قانی دشمن قارشوسونده ، محاربه میداننده  
دوگولور دیردی . مجبوریّت قطعیه اولمدقجه ، اعلام  
ظلم و استبداد قانلر ایچنده افراد ملتک وجودلرینه

صاريله رق افراد ملتی بو غمدجه قان دو کولمسنی ذره  
 قدر تجویز ایتزدی . قان دو کمکده دوام اولنورسه  
 معصوم قانلری ده دو کولور ، فکر انتقامه اولوم  
 آلت اتخاذا ایدیلیرسه اولوم ، زمان کجکجه اخوان  
 حمیت آره سنده صوقولور ، اولوم ایکننج چهره سیله  
 آره مزده بر افعی خیانت کیلیر ، نعوذ باه بر بریمزک  
 اراقه خوننه باشلارز . شبان حریت بر طاقم اغراض  
 شخصیه قربان اولور ، کابوس استبداد ولو موقه  
 اولسون بو حالدن ، بو تفرقه دن استفاده یه  
 قالقی شیر . الحذر ! ای اخوان حمیت و حریت ، اراقه  
 خوندن الحذر ! مقصد تأدیب ایسه ، مقصد جاسوسلغی  
 وطندن قالدیردیغکنز کی جاسوسلرک وجودینی ده  
 کوزدن نهان ایتمک ایسه ، ملعونلری طویلالتدیریکز .  
 ملکک هر طرفده هپسنی توقیف ایتدیریکز . صوکره  
 بو قافله اراذل و ادانی بی واپورلره طولدیریکز ،  
 ایسترسه کز زنجیرلره اوردیره رق فزانه کوندیریکز .  
 معصوم ، مظلوم ، بیچاره ، محتاج ، غریب ، بیکنه ،  
 پریشان ، چوجقلر ، مکتبیلر ، ضابطلر ، محررلر ،  
 ادیبلر ، یوزلرجه بیکلرجه عثمانلی اوتوز سنه دنبری  
 فیزان چوللرنده ایکیوردی . شمیدی ده جاسوسلر  
 اورایه کوندیرلسون ؛ بو قدر مظلومی بو قدر معصومی  
 بر نشان ، بر مدالیه آلق ویا برقاج غروش ایدنمک  
 ایچون کوندردکاری یزلر ، او دنیا جهنملری  
 نره سیدر کورسونلر ، او کورسونلر ؛ فزان شمیدی

تخلیه ایدلدی. طربلس غرب ولایتک موازنه نفوسنه  
خلل کلدی. ملکک شمدی هر نقطه سنه اماله نکاه  
ایدن اصحاب حمیت طربلس غرب ولایتنه عارض  
اوله جق شوقناغه نظر بیقیدی ایله باقه مزیا! ایشته ای  
اخوان ملت جاسوسلر حقنده اتخاذا ایدیله جک قرار  
بویولده بر جمله استهزاییه موافق اولمالیدر. جاسوسلر،  
خفیه لر شده دکل آنجق تحقیره لایقدر. طوپراقلریمزی  
بوملعونلرک پیس قانلری ایله اسقا ایتیمکز. مقصد نمونه  
عبرت ایسه بر قاجنی تپه لکه بونی ده کوستردیکمز. آرتق  
الویرر! قان دوکمیکمز، قان دوکمیکمز. ای عثمانلیر!  
شوتلغرافمی سزه مرحوم پدرمک امریله، هرثانیه یانمده  
طولاشان، وجدانمه نفوذ ایدن روح مقدسنک امر  
قطعیسیله یازدیغمی، اختیارمک فوقنده بر قوه  
معنویه نک تحت تأثیرنده یازدیغمی آکلایورم. موجودیتمی  
حس ایتدیکم قدر آکلایوب حس ایدیورم. بابام بکا  
دیورکه: اکرم، احرار ملته سویله: فرانسزلر  
اختلالرینه اعتدال ایله باشلادیلر، کیتدجه قهر وشدته،  
جبر وظلمه قابلدیلر. بیکلرجه یوز بیکلرجه آدم موت  
هائلك آغوشنه تسلیم اولندی. جاسوس، خنزیر،  
ملعون برچوق فرانسزلر آره سنده برخیلی معصوم ده  
کیتدی، فرانسه طوپراغنه دوکولن قانلردن فرانسه نک  
آفاقنی احرار حجاب استیلا ایتدی. نهایت فرانسزلر  
اولومی پنجه حکمتده زبون ایلدیلر. اعدام فکرینی  
براقدیلر. وطنلرنده قالمش اولان بقیه ارادلی



وطنلرندن طرد واجـلا ايله مملكتلريني قورتاردیلر .  
 یاز اوغلم، سن بنم نامه، بنم فکر حمیتک نامه، روحک  
 نامه احرار ملتہ یاز ! فرانسه ملتک اک صوک واصل  
 اولدینی مرتبہ یی بز انقلابمک تامبدأندہ احرار  
 ایدہلم . عثمانلیلغک نہ یوکسک ، نہ متین ، نہ  
 علوی بر خصلت اولدیغنی انظار عالمہ کوسترہلم  
 طوپراقلمزہ ، شهید قانلریلہ یوغورولمش طوپرا-  
 قلمزہ خفیہ خون ملوثی ، جاسوس دم محقرینی  
 دوکیہلم . اوغلم ، عثمانلیلرہ بنم بوفکر می روحک  
 بوامرینی سن سویلہ .

ایشته ای عثمانلیلر ، بابامک بکا امرلرینی سزہ  
 دیلمک دوندیکی قدر ، هر زمانکی لسانم اولان لسان  
 وجدانمک حار و طلاق پرور شیوہ صمیمیتیلہ  
 سویلدم ، تقریر ایتدم ، انسانلری حر یارادان الله  
 عظیم الشانک لطف ربانیسندن ، حضرت پیغمبرک  
 روحانیتندن کمالک باقی ومؤبد اولان روان حمیتندن ،  
 ملتک شو عالی ونجیب ملتک وجدان مقدسندن امیدم  
 اودرکہ کمالک بعدالموت عثمانلیلرہ کوندردیکی بروصیتنامہ  
 دیمک اولان شوتلغرافنامہم احرار عثمانیہنک یورکلرینی  
 یرندن اوینادہ جق ، روحلرینہ آغزلرینہ کتیرہ جک  
 ملعون جاسوسلر حقندہ نفی واجـلا ومؤبداً طرد  
 وتبعید قراری کلمہاہ حرمتنہ حریت نامنہ بالاتفاق  
 اتخاذ وتطبیق ایدیله جکدر .

ای عثمانلیر ! بن بوملتک فطرة ، خلقه ، ارثا ،  
 وجدانا ، قلباً وفکراً اسیر ومفتونی اولمقله ، بوملت  
 معظمه اوغرینه جانمی نه زمان لزوم کوریلیرسه  
 فدا ایتمکله مفتخر افرادندیم . بن سزک کمالکسزک  
 اوغلییم . هیچ بر زمان هیچ بردقیقه بابامک اوغلغندن  
 آیرلادم . اونک ناموس وعرفان و وجدان وحیتی تماماً  
 بکا توارث ایتمشدر . بونی هپکسز بیلیرسکسز . ایسته  
 ملتमे علناً عرض ایده بیلدیکم برنجی خدمت بنجه  
 اولین پای سیادت شوتلغرفدر . امینم که وجدانمک  
 شومأموریت مغویه سنی فوق العاده برحس سعادت  
 ومفخرتله تلقی ایده جکسکسز . امینم که بابامک وصیتنی  
 طوته جقسکسز . بونی بکا بر جمله حیات افزا برکله  
 روح آرا ایله تبشیر ایدیکسز . تا که بن ده مستریح القلب  
 اوله رق بوراده وطنک شو هجرا نقطه سنده ملتکم  
 دولتمک خدمتیه مشغول اوله بیلیم .

سزه عرض ایده جکم برشی دهاقالدی . مرحومک  
 اثرلرنی کورمک او قومق ایسترسکسز . بو عثمانلیرک  
 اک بیوک حقیدر ، بو حق ملتमे بخش ایتکده بنم  
 اک مقدس وظیفه مدر . یالکسز آنا کالی غزته لرده برر  
 ایکیشر طبع ایتدیرمک طرفدری دکلم . کمال فصل  
 برهیکل معظم حمیت ایسه اثرلری ده هم کمیت هم  
 کیفیت اعتباریه اوله بر کتله معظمه علویتدر .  
 کمالک کلیات آناری برترتیب مکمل آلتنده تماماً

باصلملى ؛ جزؤ جزؤ نشر ايديلهرك انظار مشتاقانه  
 عرض ايدملىدور . بيلمديككز ، كورمديككز  
 شعرلى وار . تاريخى وار . مكتوبلى وار .  
 تبشير ايدرم ؛ بونلرك هپسنى كوره جكسكز ، هپسنى  
 مطالعه ايدو جكسكز . كندى اشعار پريشان مالمى ده  
 طبع ايتديره جكم . قيمت ادبيه لرى هيچه قريبن اولمقله  
 برابر طبع ايتديره جكم . بونلر آره سنده ده مرحومه  
 سويلديكم مرثيه ي بوله جقسكز . مرحومك شان و  
 شهادتنه ياقيشه جق درجه ده بر شعر اولديغنى سزه  
 سويلمكدن هيچ چكينمهم . بو وظيفه لرك هپسنى هپسنى ايفا  
 ايدو جكم . شوقدر كه آره دن بر آز وقت كچه جك ، وقت  
 اك ضرورى بر قانون مجبر دكلىدر ؛ اى احرار ملت !  
 جريتكزى استحصال ايچون اوتوز بش قرق سنه صبر  
 ايتديكز ، بكه ديكز ؛ مقتداى عرفانكز اولان كمالك  
 آنارنى او قومق ايچون البته بر آزمان صبر ايدرسكز .  
 بكا باشقه نه امر كز وارسه اونى ده همان تبليغ ايديكز .  
 امينم كه سزك هر امر كز وجدان ملت ، كمالك مسلك  
 حرितنه موافق و بناء عليه كمالك اوغلى ايچون ده  
 در حال اجراسى فريضه ذمت اولور . جوابكزى  
 بكليورم .

بو تلغرافك سالانيكه واصل اولنجه يه قدر  
 بر چوق مركزلردن آلتيركن خطايه اوغرايه جغنده  
 شك وشبهه اولمايان كلمه لرى جمله لرى طوغرو اوله رق  
 اعاده ايدلدكدن صوكره عيناً نشر اولمىنى

عنایت اخوتکاری بکردن تمنی ایلر و بتون عثمانلی احرارینه  
تاجان اویمدن عرض تعظیبات بی غایات ایلرم .  
یاشاسون حریت ! یاشاسون ملت ! یاشاسون  
عسکر ! یاشاسون حمیت ! .

کمال زاده

اکرم

### انمار و نرقی

کمالک روح پاک و معززینک برخطاب هانقی  
و مغنویسی حالنده قلوب ملنی تهییج و متحسس ایدن ،  
ملتک اوتوز سنهک محرومیت حریتله برابر ضایع  
ایلدیکی اومقتدای قدسی احرارانی ایچون مستغرق  
اولدینگی ماتم ابدی بی تعدیل ایلیان ، کمالی اوشمس  
غارب ادب و حمیتی ، یکیدن بتون شعشعه حماست  
وطنپرورانه سیله بتون قوه سحرار شعر و مکارمیه  
آفاق سعادت مزده انفلاق ایتدیرن بوتلغراف ، بو ۱۸۰۰  
کلهک برات عظمای ادب و حکمت ، جهان مدنیت  
قارشو وثائق فاخره انقلابمز آره سنده برجای تکریم  
اشغال ایلیه جک اولان بو وثیقه بی عمتای حمیت ،  
ای نجل اکرم کمال بزه شونی تبشیر ایتدیکه وارث  
موهوباتی اولدیغکز اووالد معزز و مقدس ککز نجل  
کریمی صورتنده بتون کمالات ادب و حمیتی ، بتون



معالی احتساسات وطن و حریت پرورسی ایلہ ،  
 بتون آثار و افکار ایلہ آره مزده یشایور . روح کمالک  
 اخطاراتنه ، احتساسات علویہ وجدانیہ کنزده کی  
 نراہت و صفوت موروئہ حمیتہ ، مواعد مبعجلہ  
 لطفکارانہ کنزہ بتون صمیم امتنا منزله تشکر ایدر ،  
 بیوک برتشنکی و تہالکله انجامز وعد کنزہ انتظار  
 ایلرز .





قلعه سلطانيه دن چكلمش في ٣١ تموز سنه ٣٢٤  
تاريخي و ١٤١ نومرولو تلفراف :

## قدسده بيروت واليسى اكرم بكه

قلعه سلطانيه نك بتون ضابطان وامراى عسكريه  
ايله مأمورين ملكيه سى واپور مخصوص ايله واحتشام  
فوق العاده ايله بو كون كليبولي يه كلهرك مؤسس بنیان  
حریت پدريكنز كال بك پدرمز مرحومك قبرينه  
يوزلر سوردك ، روان پاكنه ختم شريف وفاتحه لر  
تلاوت ايتدك ؛ اى ملتة شوداهى معالى پرورك يادكار  
قيمتدارى اولان اكرم ، همت همت كه ملت سندن  
خدمت بكلكر پدرك كى حياتى استخفاف اقبالى استحقار  
ايت ؛ صدر اجلالك سينه تعظيم امت اولسون .  
قلعه سلطانيه اتحاد  
وترقى جمعيتى



## قلعه سلطانيه اتحاد وترقى جمعيتنه

بابامك ساقزده جامع قايسنك اوكنه آتويوردكلرى  
نعش مباركنى ابوالضيا توفيقك استحصال ايده بيلديكى

اراده سینه اوزرینه اورادن چقه ره رق بولایره بن  
 کوتورمش تابوتی عسکرله برابر بن طاشیمش ایدم.  
 شیمدی کعبه عثمانیانک زیارتنده سزکله برابر بولونه.  
 مادیغمدن دولایی نه قدر متأسف ایسه تلغرافکنزی  
 آملقه او قدر مفتخرم. زیارتکنز مبارک اولسون، ای  
 احرار مسلمین، قلب مجروح وطنده یاتان کمالک روح  
 کریانی خندان ایتدیکنز. بندن همت بکلیورسکنز  
 اویله می؟ عموم جمعیتلرکنزه ده ها کچن کون تلغرافله  
 یازدم: حیاتم مال موروثکنزدر؛ نه زمان وطنک اک  
 کوچوک بر سعادتق ملتک اک دکر سز بر فیضی ایچون  
 کمال زاده نک فکرینه قلمنه قلبنه وجدانه وجودینه  
 حیاته احتیاجکنز اولورسه بونلرک هپسنه همان تصرف  
 ایدیکنز؛ هپسی سز کدر. هر زمان حیاتی استخفاف،  
 اقبالی استحقار ایتشمدر. اون سکنز سنه ییلدیزده کوز  
 حبسنده قالدیم؛ ینه ملنمه خدمت ایتدم؛ ملنعت استبدادک  
 زبون قهری قالان قلممله پنجه مظالمده صیقلان قلبمله  
 فکرمله حاصلی هر حالله خدمت ایتدم. بوکون کمال  
 زاده یه بیان حسیات ایدن احرار امت آره سنده ع.  
 نادری بیلمین وارمیدر؛ اگر می ایکی سنه یه یاقین قدس  
 متصرفلغنده ده کوردیکنز.

منفرد قالدیم بویولده کائناتک رغنمه

حکمت شیرانه می بنم ایچون اویله بر منهای سمادت  
 او قدر ابدی ولا یتغیر بر خصلت درکه رغنماً للعالم

قدسده ارتکاب و ارتشایه ، ملعنته ، ظلمه اعلان  
 حرب ایدرک خرسزلفی زیر و زبر ایلدم ؛ جاسوسلغی  
 بوسنجاغه اوغراآتمادم . ای قهرمانان دین و ملت ، ای  
 پرستشکاران حریت ! کمال-کنزی نه قدر تقدیس  
 ایدرسه کنز آزدر ؛ فقط اکرمکنزی ده پک چوق سوه  
 بیلیرسکنز که اوده سنزک امریکزه جانیله حیاتیله آماده  
 بر مرد حمیت ، بروطنپرور صاحب همتدر . یارین بیروته  
 کیدنیورم ، جمله کنزه احترامات بی پایان و تحمیدات  
 وجدان عرض ایلرم .

کمال زاده

اکرم







## عثمانی اتحاد و ترقی جمعیتی و ساطتیلہ قہرمان حریت انور بک

قدس : فی ۳۰ تموز سنہ ۳۲۴

قدسہ بوکون ہنوز شمدی واصل اولہ بیلن  
غزتہ لردہ رسمکزی کوردم . اولہ برزماندہ کہ بیروته  
کیتمک ایچون قدسدن آیریلیرکن قدسده کی عسا کر  
شاهانہ یہ ایراد ایدہ حکم نطق یازمقلہ مشغول ایدم .  
سزک سیما ی جلادت و مال حمیت و حریت کزلہ یازمقدہ  
اولدیغ نطق آره سندہ کی روابط معنویہ یہ حیران اولدم .  
آہ ، ای قہرمان عسکر ! ای شهید ذی حیات وطن !  
شوحریت جوشا جوشک ، شوکرہ ارضہ صیغہ میان ،  
کوکلرہ قدر ارتقا ایدن سعادت ملتک بر ذرہ سنہ  
مظہر اولہ مادن زنداندن زندانہ ، منفادن منفایہ  
آتیلہ رق ، ملتک سیاه ماتملرینی ، قانلی کونلرینی  
کورمکہ قاتلانہ رق هرکون ، هر دقیقه موت حزن  
ویأس ایله اولمکدن قورتوله میان ، نہایت برکوشده  
عادتاً کنج یاشنده وفات ایدن بیچارہ ، بد بخت کمالہ ،  
اولدیکی وقت موتنہ اوغلندن بشقہ مرثیہ سویلیہ جک

بر شاعر بیله بوله میان عاشق ازلی ملت ، محروم  
 جریحه دار حریت کماله سن ، سن نیچون برنانه شو  
 قهرمان طور ذی وقار حمیتکله ، شو علوی مال شان  
 و قدرت و حماستکله کورونمک ؟ کل ، مشیت ازلیه ،  
 ارادات الهیه بویه ایمش . کمال شهید اوله جقمش که  
 دنیایه سن کله سک .... کل شمعی مرحوم بابامک  
 روح شادانی دوداقلرمده اهتزاز ایدوب طوررکن  
 کل ده سنک جین معلا مرتبه کی بن اوپیم قاردشم  
 کمال زاده

اکرم

\*  
\* \*

### انعام و ترقی

کمال زاده اکرم بک افندینک بوندن اولده نشر  
 ایتدی کمز بیک ساکنز یوز کلهک تلغرافنامه لری  
 مرحوم مقدسک قلوب ملنده هیج بروقت اولمه مش  
 اولان خاطره سنی برقات دها احیا و تقدیس ایتدیردی .  
 اکرم بک انور بکه خطاباً کوندردیکی یوقاریکی  
 تلغرافنامه سنی ده عین مقصده خادم اولمق اعتباریله  
 مع الافتخار درجه مسارعت ایدیوروز . انور بک  
 حقنده کی تقدیراته میر مومی الیه طرفندن بیان  
 تشکرات ایلرز .

یافه : فی ۲ اغستوس سنه ۳۲۴

مرحومك ، ايلك اويناديلىشندە طراقة بلنديله  
ايوان استبدادی صارصان « وطن » ی اوينادقلىرى  
كدك پاشا تياتروسنه بنی بابام ماغوسه زنداننده  
بولنديغی زمان کوتورمشلر ، بابامه مخصوص لوجهی  
بكا آچمشلردی . لوجهك چوقه قابلامش دیوارلرینی ،  
دوشه مهلرینی دها کوچوك برجوجق اولدیغ حالده  
حسرت کمال ایله آغلايه آغلايه اويدیکمی حالا تخطر  
ایدیورم . ایشته شیمدی ده روح کمالک مسعودیت  
اخرویه سنه هر کون بریشقه نشوه تبریک ومفخرتله  
اشتراک ایدن روحم « وطن » تياتروسنی برساحه  
جریتمده اوينامغه موفق اولان شبان ملتہ عرض  
احترامات ایدیور ، اونلرک کوزلرینی اویرم .

کمال زاده

اکرم





## بالعموم ولایات والویۃ غیر ملحقہ مرکز لرنده متشکل اتحاد و ترقی جمعیتلرینه

حریت لفظ مقدسی علوی بر طراقة صاعقه  
آهنك ايله ملتك قلبندن فوران ايدرك آسمانلرده  
ولوله آرای ظهور اوله لی آره دن یکر می کون  
کچدیکی حالدہ بن بورادہ قدسده مرحوم پدرمدن  
بحث ایدن ، اونك روح مبارکنه ملتك ، عثمانلیلغك  
وعثمانلیلرك ندای شکران ومحمدنی ایصال ایلین غزته .  
لری ، رساله لری هنوز برر ایکیشر کوره بیلیورم . قدس  
وطنك دیکر محملرینه او قدر اوزا قدر ؛ خصوصیه  
پوسته لری او قدر غیر مطرددر . قدسه استانبولدن  
بر آیده مکتوب کلدیکی وارددر . ایشته بوسبیدن طولانی  
بابامك روحنه بر فاتحه قدر مقدس دینلمکه احرا  
آوازه حریتی حسیات شکران ملتی ایصال ایدن ، نام  
حقیرانه می ده مرحومه حرمة یاد ایلین احرار  
عثمانیانك ، عثمانلی عسکرلرینك ، عثمانلی محررلرینك هر  
برینه آیری آیری حسیات وجدانیه می عرض ایده .  
مدم . سلانیکده منتشر « اتحاد و ترقی » غزته سنی توسط  
ایدرك غزای حریتیزی تبریک ایلد مسه ده غزته نك ساحه



وسیع الانحای وطنه نه قدر زمانده انتشار ایده جگنی  
 بیله م . حالبوکه هر طرفدن مملکت مزک هر گوشه سندن  
 بکا تبریک نامه لر ، تلغرافلر یاغدی ریلور . بتون حسیات  
 ملت ، وطنک هر نقطه سندن جوشان اوله رق کلیور ،  
 کلیور ، قدسده برهاله غرای حریت شکننده نظره کاهمی  
 احاطه ایدیور ، صماخه برولوله دورادور و خنداخذ  
 نجات و سعادت ، جاذبه قانونلرینه قاپیله رق فضای  
 نامتاهیده دور ایدن قوجه بر کره حیاتک سداى  
 و آهنگ ازلیت نمونه مشابه بر طراقة بلند حریت  
 اورویور ؛ آه ای احرار ملت ، ای شبان معرفت ،  
 ای صاحب سیوف جلادت ، ای عسکرلر ، ای قهر-  
 مانلر ! بیلمز سکز ، تصور ایده مز سکز که وجدانم ،  
 بابامک نور نگاهنه سنه لرجه معروض اوله رق بر مطلع  
 مجلای حمیت و حریت ، بر منبع بی انتهای حب وطن  
 و ملت کیلیمش اولان وجدانم عثمانلی اتحاد و ترقی  
 جمعیتلرینه بتون شوغزای اکبر احراره اشتراک ایدرک  
 مظفریت مطلقه حریتله تأیید شان وطنه موفق اولان  
 استبدادی ، ظلمی ، جاسوسلغی ، سانسوری ، حاصلی  
 دور سالفک بتون مظالمی بر حمله شیرانه ایله محو  
 و پریشان ایلین عثمانلی عسکرلرینه ، عثمانلی محررلرینه ،  
 عثمانلی ارلرینه قارشو نه قدر ، نه قدر صمیمی ، عمیق ،  
 علوی ، ابدی حسیات شکران ایله مدیون ، نصل بر  
 انجذاب و میل ابدی ایله مفتوندر . بونی ، بنم بو حالمی  
 تصور ایتمک بحق حریت ملت ممکن دکدر . ممکن

دکدرکه بن سلا نیک عثمانلی اتحاد و ترقی جمعیتک  
طبع ایتدیرمک اطفکار لغنده بولندیغی مرثیه مده :

وجدانی یاره لی یورکی قانلی بر شهید

مصرعیله توصیفنه چالشدیغم بابامک ، اوکندینه دنیا ده  
جانلی بر شهید نامنی ویرن قهرمان حریتک اوغلویم .  
اونک بوملت اوغرینه نه لرچکدیکنی ، زندان اسارتدن  
زندان اسارته نصل آتلدیغنی ، حقارتدن حقارته ،  
مذلتدن مذلته اوغرا دلق ایستلدیکنی رأی العین  
هر زمان کوره رک ، اونک اوشانلی اضطرابلرینه اشتراک  
ایدرك شوملتک کندینی پنجه ظلم و اسارتدن تخلص  
ایده بیله جکندن امیدى منقطع ارباب عقوله رغماً  
استقبال ملتدن ، مظفریت حریتدن قطعياً امین اولان ،  
قلمنی هر کون قیردقلری حالد ینه امین اولان ، یورکنی  
هر کون پارچه لادقلری حالد هیج بروقت ذره قدر  
فتوره حتی ترده دوشمین قهرمان دین و ملت ،  
سید احرار امت ، شهید ذی وقار حیت کمالک :

ماهیتی حیت ایدی ، فکری حب حق ،  
معشوقی خامه ، فطرتی عثمانلی بر شهید .

بی تیله شان بلندینی توصیف ایلدیکم کمالک ، شیمدی  
شو عید اکبر عثمانیانه بوانه میان ، حریتک سلطنت  
مطلقه سنه قاووشه میان کمالک روان ذی وقار حیتی

فصل زار زار و کریان ، فصل مسهوف اشتیاق  
و هجران قالدیغنی آغلایه آغلایه آجی آجی حس ایدیورم.  
اوت ؛ بر طرفدن بونی حس ایدیورم، بر طرفدن ده  
شو عالی خصلت عثمانلی ملتک کماله ، کمالک  
طوبراغنه ، کمالک خاطره سنه ، کمالک اوغلنه ،  
حاصلی کمال نام علویسنه منسوب هر شیئه قارشو  
کوستردیکی هر واسطه ایله وطنک هر بقعه سندن ،  
هر گوشه سندن اعلان و اظهار ایلدیکی میلیونلرجه  
شکران و منت و پرستش و مفتونیت آثار بلندینه حیران ،  
هیچ بر قوه بلاغله هیچ بر قلم و ناطقه فصاحتله  
بر ذره سی توصیف اولنهمیه جق قدر حیران اولوب  
قالیورم. کمالک درجه علویتنی بیایدیکیز؛ ایشته اوغلی  
اکرمک ملته ، عسکره ، وطنه ، مملکته ، حمیته ،  
عثمانلیلغه نه قدر مفتون اولدیغنی ده کنسیدیسی سزه  
عرض ایدیورم. حسیات شکر و منت و مباحاتی عثمانلی  
حمیت و دلرینه عرض ایچون ایشته بن سزک کمالکزک  
اوغلویم ، بنم ده حیاتم ، فکرم ، وجدانم ، قلمم ،  
هر درلو قابلیتم سزکدر .


اوغلویمک مرقدی آل قان اولسون

دیین بابامه لایق اولاد اولدوغمی ذاتاً بیلیرسکمز ؛  
ای احرار ملت ! ذاتاً بونذن قطعاً امینسکمز. فقط  
بن سزه حیاتمک خدمت دولت و ملته موقوف اولدوغنی  
سویلمک وظیفه سیله وجداناً مکلفم . ایشته بونی

سویلیورم، علناً اک صمیمی لسان قاب و روحله سویلیورم۔  
ایکی کون صکره عهده مه توجیه بیوریلان بیروت  
والیلکی وظائفی ایفا ایچون قدسدن بیروته کیده جکم۔  
اغستوسک ایکنجی کونی بیروته واصل اولورم۔ بیروت  
ایله مخبره قدسه نسبة پک آساندر۔ وسائط متعدده  
وسریعه موجوددر۔ بیروتده اک فداکار برخادمکنز  
اولدیغنی اونوتمایکمز؛ ینه سزه عائد ملتہ عائد دیمک  
اولان وظائف رسمیه مدن وقت بولدقجه، سزه ای  
اخوان حریت، ای احرار ملت سزک غزته لریکمز  
یازی یازہ بیلیرم۔ سؤالریکمزہ جواب ویرہ بیلیرم۔  
ترددلریکزی ازاله یه چالیشیرم۔ سزه بلکه برچوق  
زمان طریق سلامت ونجاتی کوستیریم۔ اوت، بونلرک  
هپسنی بن یامغه مقتدرم؛ چونکه وجدانم حسیات  
ومدرکات کماله، بتون علویات کماله بر مخزن بی اتہادر،  
برحفظه حقایق منوره در۔ وجدانم انظار کمالک  
انعطا فلرندن جذب انوار حقایق ایلمش بر مرأته  
تشبیه اولنسه سزادر۔ او مرأته کیم مدنکاه ایلرسه  
برلمعه حقیقت، برضیای سعادت ملت جذب ایده بیلیر۔  
بندن نه ایسترسه کز سویلیکمز، امر ایدیکمز، شونی  
هیچ بروقت اونوتمایکمز که سزک یعنی شو ملت  
عثمانیه نک هر معناسیله عقلاً وجداناً حتی شرعاً بر  
بیوک مال موروئی، اک فداکار بر بنده ابدیسی،  
اسیر شان حریتی بوکون شو امضایی وضع ایدن  
انساندر۔

کمال زاده

اکرم



« خدمت » غزته سنده مندرج مقاله در

## کمال بکی تقدیس ایده لم

کالك شانلی ، ناموسلی اوغلنه

کمال ایله حریت آره سنده نه اساسلی بر ارتباط ؛  
نه طبیعی بر مناسبت واردر ؟ ایکی لفظ مترادفه  
بکزه یین بوکله لری بر حس ایله تقدیس ایدر ، بری  
ذکر ایدیلنجه مطلق دیکرینی خاطرلارم . کمال ،  
اومعظم مربی ملت ، شکل بشره تمثیل ایتمش حریت  
ایدی . اونی ملتک بوسعادتلی کونلرنده آکامق ، اک  
پارلاق سوزلرله تکریم ایتمه مک قدر شناسلق مزیتنه  
منافی دوشر . بوجسم حمیت ؛ شومقدس ملتک نجیب  
افرادى آره سنده مکلف برانسان صفتیله اثبات وجود  
ایدر ایتمز حریت ! حریت ! دیه فریاده باشلامش ،  
اسارت زنجیرلری التده ایکله یین یچاره لرك اولونجه یه  
قدر شریک تأثری اولمقدن قورتلما مشدر . خاطره  
قیمتدارینه حافظه تکریم امتده ابدی بر موقع اعزاز  
تأمین ایدن بونادره خلقی تجیل ، حریت احترامدر .  
کالك ؛ روحلر اوزرنده ابدی برحق حاکمیت مالک



اولان خامه ذی قدرتنه هیمز منتدارز . حریتک  
 اک علوی تجلی اتنی بزه اومقتدر قلم کوستردی ؛  
 وطنپرور لکک اک قیمتی ذوقلرینی بزه ینه او عالی  
 قلم حس ایتدیردی . کمال ؛ ملتی ایچون چالیشهرق  
 تقدیس ایدرک اولمش ، بویوک بر وطن باباسیدر .  
 یاشامش ، ملتنی التزام حقانیت ، استحقار منفعت  
 دینان مزیتلری آنده مشهودیمز اولان درجه سیله  
 کیمده کوره بیلیرز ؟ اقتداری قدر حمیته ، غیرت ملیه یه  
 مالک اولان کمال ؛ مدت حیاتنده یالکیز بر مقصد  
 تعقیب ایتشدرد : سعادت ملیه ! نه چاره که اوسعادت  
 کوره مدی . کوزلری آچیق کیتدی . دولتک پک  
 بیوک بر موقع سیاسیسنده بولمنسی لازم کلن بوداهی  
 عالی نهادی حکومتک او زمانکی طرز اداره سی  
 ماغوسه زندانلرنده ، منفالرده چور و تمش ایدی .  
 فقط نوردن مخلوق قلبنه هیچ بر سبیلله لکه  
 دوشورمین ، قوه عزمنه اک بویوک بلالرقارشیسنده ده  
 خلل کتیرمه ین کمال ؛ نه حکومتک بو محقرانه معامله لریله  
 مسلکنی بوزمش ، نه ده ملتک کندیسنه قارشی  
 قیدسزلق کوسترمه سندن متأثر اولمشدر . او یالکیز  
 وظیفه سنی دوشونور .

اولور سه م کورمه دن ملتده امید ایتدیکم فیضی  
 یازلسون سنک قبرمه وطن محزون بن محزون

دیر کیدردی .

کمالک مسلکی اوزرنده زمان استبدادک هیچ  
بر تأثیری کورلمه مش ، اک دهشتلی مصائب اونافند ،  
آتشین نظرلری ابدی نقطه تعلق اولان چهره  
نورانی حریتده آیره مامش ایدی .

شر ایدی کوردم ده آیرلدم ذهاب کائنات  
منفرد قالدیم بویولده کائناتک رغنمه

بیقی قوه غزمنک نه پارلاق برهان کمالیدر .  
اوبویوک ، حمیتلی ترک ؛ محیطک سویه فکریه سنی  
سعادت عمومیه دن عبارت اولان مقصد مقدسک  
حصوله مساعد کورمدکجه روحنده تحملسوز آجیلر  
دویار ، وفقط معشوقه وجدانی اولان حریته قارشی  
آن بآن متزاید بر ابتلا ایله اظهار مفتونیتدن کری  
قالمازدی . کونشله افاضه نور ایدن فکری ، معنویاته  
خاصه تجسم بخش ایدن قلمی ایله عثمانلی عالم شعر و انشاسنده  
پک عالی بر موقع انفراد قازانان کمال ؛ معنای حقیقیسیله  
اصل بر خاندانک وارث شان و شرفی ، بشریته  
هر قول و فعلیه درس علویت ویرر مکرم ، محترم  
بررکنی ایدی . حیات قیمتدارینی ملتک مدافعه حقوق  
مشروعه سنه ، خامه اعجازینی ابطال ظنون ایله تفسیر  
حقایقه ، تصویر علویاته حصر ایدرک اوشان و شرفی  
برقات دها اعلا ایتدی .  
عثمانیلینی ، ترککی کمال قدر آ کلامش ، اونک قدر  
سومش ، تقدیس ایتیش کیسه کوستره میز .

وصیتی اوزرینه ساقزده کی مدفندن چیقار یله رق  
 بولایرده روم ایلی فاتح اولی شهزاده سلیمان پاشانک  
 قبر منوری یانسه دفن ایدلمسی ده عثمانلیغه اولان  
 حرمتک ، محبتک صوک دلیلیدر .

بز اول عالی همم ارباب جد واجتهادز کیم  
 جهانگیرانه بردولت چیقاردق بر عشرتدن

بیتله تفاخر اوروح اصیله نه قدرده یاقیشیور !  
 افراد ملتی کوز اوکنه کتیره لم ، بوتون حریت  
 طرفدارلری کمالک شا کرد مسلکی دکلیدر ؟...  
 عسکرلر یمزک مقدس قلچر یله قازانیلان سعادت  
 ملیه یی تبجیل ایچون اوچ ، بش کون ظرفنده پک  
 چوق یازی یازلدی . بونلره حسیات ملیه یی تحریک  
 ایچون علاوه ایدیلن شعرلر کیمکدر ؟ . هر کون  
 علاوه لر نشر ایدیلیور ، غزته لره ده برچوق مقاله لر  
 یازیلیور . بونلرده یا ؛ عالی برحس مفتونیتله معشوقه  
 حریت قارشسی سویلنمش اولان :

نه افسونکار ایمشک آه ای دیدار حریت  
 اسیر عشق اولدق کرچه قورتلدق اسارتدن

بیتنی ویا :

معینی ظالمک دنیاده ارباب دنائتدر  
 کوپکدر ذوق آلان صیاد بی انصافه خدمتدن

حقیقتی ویا :

نه ممکن ظلم ایله بیداد ایله احسای حریت  
چالیش ادرا کی قالدیر مقتدر سهك آدمیتدن

خطابنی کوریوزر. افکار ملتله منطبع شعر لر اره سنده  
حسیات وطن پرورانه بی بونلر قدر اعلا ایده جک سوز  
بولابیلیر می یز ؟  
هله شو :

جوانمردان ملتله حذر ! غوغادن ای بی داد  
اریر شمشیر ظلمک آتش خون حمیتدن

بیته باقکز !

قانلری غلیانه کتیره جک قدر مؤثر ، عالی  
بر خطاب دایرانه بی متضمن اولمقله برابر بوکونکی  
حالمزه نه قدر موافقدر . اوت ! بویونلر مزه حواله  
ایدیلن شمشیر ظلم خون حمیتمزك حرارتیله اریدی ،  
آتشین بر زنجیره تحول ایدرک مستبدلرک ، اوملعون ،  
مستکره مخلوقلرک بویونلرینه کچدی . الحمدلله !  
بوکون بزم ایچون کماله قارشی ایفا ایدیله جک بر  
وظیفه واردرکه اوده روح بلندینه فاتحه اوقومق ،  
اونک عشقنه ، شرفه « یاشاسون حریت » آوازه سنی  
کوکلره چیقارمقدر . اوروح علوی ایچون بوندن قیمتلی  
هدیه اوله ماز .

## کماله خطابم

ای معظم حامی، حریت! مقدس مربی، ملت!  
 سنه لرحه استبداد التده ازلدکن صوکره  
 کوستردیکک یولی تعقیب ایدمایدہ حریتنه نائل اولان  
 شو بویوک ملت بوسعادتی کوننده کوز یاشلری  
 دوکهرک سنی تقدیس ایدیور.

بویوکسک! بویوکسک!

انسانلغک سفلی، محقر آمالی اویوکسک، پاک  
 قلبکه هیچ برزمان ایریشهمدی. انسانلر سنی کورمک  
 ایچون دائماً باشلرینی قالدیرمغه مجبور اولدیلر. قلبک  
 قبله کاه معالی ایدی. مدفک کعبه حریت اولدی!..  
 بویوکسک!

بویوککک نه دیمک اولدیغنی هر سوزکله، هر فعلکله  
 خلقه کوستردک! حقیقت بارقهلری صاچان قلمک هیچ  
 برزمان آلت شر، واسطه اغراض اولمادی.

نطقک قلبلری خلجانلر ایچنده براقدقجه قیلیجلر  
 قینلرنده تیتتردی. ایشته اوقلیجلر میدانہ چیقدی.  
 ایلک ضربہ سیله استبدادی محو ایدیوردی. ملت،  
 بویوکسک سعادتی ایچون سکا عرض شکران ایدیور  
 والی الابد ایدہ جک.

بویوکسک!

ملنک ایچون یاشادک! ملت دییه دییه اولدک!



امینز که صوڪ نفسکده بزم سعادتمزی تمنی  
ایدیوردك .

آه ای سلطان حریت ! سن بزم بوکونکی حالمزی  
کورملی ، دائما فلا کته آغلادیغک ملت یوزندن  
برکرده کولمه لی ایدک !

بزه بوکون خیالکه قارشى دوکدیکمز کوز  
یاشرینی باصدیغک طوبراقلره صاحهرق سنی تجیل  
وتقدیس ایتمه لی ایدک . نه چاره که بوسعادتمز اکیسک  
قالدی !

ای بویوک عثمانلی ! ای حمیتلی ترک ! کیمکلرک  
زده ده بولونورسه بولونسون ، مدفنک قلب امتدر .  
نور ایچنده یات ! . .

توقادی زاده

شکیب



خدمت غزته سننده توقادی زاده

شکیب بکه

خدمتک بکا کونزد دیککز علاوه سنی بوکون  
شیمدی آله بیلدم . پوسته لریمزده اداره سابقه مزک  
هر شعبه سی کبی لغت اولسون ! بابامک روح مبارکنی

عالم علی بنده انوار ابدیت ایچنده خندان سرور  
 ومفخرت ایدہ جک قدر حب حریت، میل انسانیت،  
 تقدیس معالی حسیاتیلہ یازیلان، اون بر تموزدن بری  
 وطنک هر گوشه سندن تادامان عرش عزته قدر  
 یوکسلان تهلیلات وجد وافتخار ومباهات احرار  
 عثمانیان آره سنده ازمیردن چیقان، سزک او آتشین  
 قلمکنزدن دوکولن موسیقارزار جنان وروان قدر  
 هیچ بر تهلیل ملیت، هیچ بر تکبیر حریت بکا بو  
 تأثیری حاصل ایدہ مامش، بنده بودرجه لرده هیجان  
 فخر ومباهات حسلری او یاندره مامشدر دیسه م  
 طوغرو سویلمش اولورم . ای خامه قدرت، ای  
 صاحب ناطقه معلا بلاغت، ای برادر حریت، هر  
 کیم اولور سهك اول، شکیب؛ مرحومك ده اوغلنك ده  
 روحنی تسخیر ایتدك؛ وجدانك تا عمق حسیاتنه  
 تاجان اویمه قدر تأثیر ایتدك؛ صانکه اللهم ی تقریر  
 ایتدك . ایشته «کمالک ناموسلو وشانلی اوغلی» عنوان  
 نلریله ولسان حریتله تجیل ایتدیكک اکرمده شو  
 حکمکده ذره قدر یاکلدیغکی پک اصابت ایتدیکی  
 سکا لسان وجدانیله بیان وتأمین ایتسکه اتحاد وترقی  
 جمعیتنک وطنک هر گوشه سنده کی مرکز لرینه بوکون  
 یازدیغم تلغرافنامه ده بیلدیردیکم اوزره ذاتاً خدمت  
 ملتیه موقوف اولان حیاتی هپکنزک، ای احرار  
 عثمانیان، هپکنزک اقدامات خدا پسندانہ سنه اشتراك  
 ایدرک هر دقیقه هر نانیه وطن اوغرنده فدایه مهیا،

تاجان اوندن مهیا و آماده بولندیغنی تکرار تکرار  
 سویلمکله سکا، ای صاحب دهائت ادب و عرفان،  
 سکا هزاران تقدیسات و تحمیدات اهدا ایلر، مرکزدن  
 مرکزیه کیده جک شو تلغرافده حیفا که وقوعه کله -  
 جکندن امین اولدوغم خطالرك تصحیحی او قلم دهائت  
 و فضیلت کدن تمی ایدر و کوزلرکی او پرم قاردشم .

فی ۳۱ تموز سنه ۳۲۴ کمال زاده

اکرم





## قدسده کی وداع نطقی

قوماندان بك ، ضابط بککړ ، عسکر لر !  
اون یاشنده صاریشین برچو جوق طانیرم؛ کوزلرنده  
برمال حمیت، جبهه سنده بر ضیای حریت منطبع  
کورونور. بوچو جوق هرکون بروطفه مقدسه یی ایفا  
ایله مکلفدر: هر صباح طلوع شمسدن بر آن زمان  
صکړه بر قشله یه کلیر، نفرا تګ آره سنه کیر، منسوب  
اولدینی بلوکه عائد وظائف عسکر یه یی کوچوک  
قدرتک، عاجز وجودینک یتشددیکی قدر ایفایه باشلار،  
نوبت بککړ، سلاحری سیلر، قشله نک تنظیفاته نظارت  
ایدر، افراد عسا کړه تبارک جزؤندن سورهلر او قو-  
تدورر، نهایت قاراوانه بوروسی چالنجه نفرات ایله  
برابر پادشاهک سفره سنه اوطورور، ملتک اکمکنی یر،  
قارننی ایجه طویورور، عسکر لرله برابر آللهک نعمته  
حمدو ثنا پادشاهه، ملته، دعا ایدر، صوکره بلوکه افرا-  
دندن اولان وزیبت عنوانیله شهرت بولان قهرمان  
بر عسکر کنديسنی آلیر، اوینه کوتورور. بوچو جوغی  
طانیه جغم کلیور؛ حتی ایشته شیمدی وجوه مهابت  
وجلادتکزه مد ایلدیکم نظره وجدان حافظه می تنویر

روحه تأثیر ایتدی؛ او عالمی تماماً عیناً تخطر ایتدم :  
 طابور، یونانیلرک ملحوظ اولان تجاوازاتنه قارشو  
 مدلولیه کوندرلمش بولنان کرماسقی ردیف طابوری؛  
 بلوک، بو طابورک ایکنجی بلوکی، زیبک دنیلان عسکر؛  
 اوبلوکده بر نفردر. صاریشین چوجوقده ایشته  
 شیمدی قارشیکزده طورویور، سزه خطاب ایدیور:  
 صاریشین چوجوقده بئم.

بوکون حریتی استحصال ایچون وطنک هرکوشه.  
 سنده قیام ایدن، سلاحه صاریلان ملت نجیبه عثمانیه نک  
 اویدی عصرلق شان وعظمت واقبالیه تاریخ انسانیتده  
 ابدی الاشتهار اولان عثمانلی قومنک کندیسى نه قدر  
 بیوک ایسه عسکری ده او قدر بیوکدر. باقیکز، اوملت  
 آهن نیچه استبداده قورتوله میه جقمش براقیه جقمش  
 کی طوتیلوب طوران، صیقیلان، ازیلن حیاتی —  
 اوت، حیاتی دیورم؛ چونکه برملتک حیاتی حریتندن  
 عبارتدر — قورتارمق ایچون فیلا یور، جوشیور،  
 بتون موانی زیر وزیر ایدیور؛ جبال متسلسله ظلم  
 واستبدادی دوشندن سیلکوب آتیور، یورویور...  
 بونهر خروشان عصیتک بوجر عمان نجدتک پیشداری  
 کیم؟ عسکر! قوه استنادیه سی زرده؟ عسکرک  
 یورکنده! عسکر اوفیض قدسی الوهیه مظهر اولان  
 قوه قاهره، او روح دولندر. حتی عسکر عین ملتدر.  
 ایشته بوکون شوراده سزک قارشیکزده بو حقیقی  
 بتون وجدان وعرفانله حس ایدیورم، آکلا یورم،



شیمدی تقدیر ایدیورم؛ بابام نیچون نی قشله یه  
 کوندرمش، بکا عسکرک حیاتی یاشامش، قلبمه نیچون  
 تاچوجوقلغمدن بری عسکر بختی فنا بولیه جق صورتده  
 ابدی اوله رقی رلشدیرمش؛ بونلرک هپسنی بتون عثمانلی  
 ملتی حریتی زنجیرلرندن قوپاروب چکوب آلیرکن  
 « یاشاسون کمال یاشاسون حریت » دییه صیحه لر  
 ایدرکن بن آکلایوب تقدیر ایدیورم. عسکره ارئی  
 وفطری اولان محبت حقه ده بوندن زیاده بر شی  
 سویلمکه مقتدر دکم؛ ذاتاً عسکرک علو قدر و شانی  
 فیض نطق و تکلمدن اعلا در. قدسدن آریله جغم کون  
 سزه وداع ایدرکن قلبمک نه درلو حسله له متحسسل  
 اولدیغنی سز کندیگز بیلیرسکز، تقدیر ایدرسکز.  
 بتون او حسلرمی ممکن اولسه یدی هپکزی آیری آیری  
 مصافحه ایدرک بیان اتمکه چالیشیردم. فقط ایشته  
 وجدانمک شو املی استحصا ایچون دخی وقت  
 وامکان یوقدر. هپکزک یرینه قوماندانکزله، ازهر  
 جهت حرمت ورعایت شایان اولان قوماندانکز بک  
 افندی ایله مصافحه ایده حکم. الوداع ارقداش لر!  
 بوراده بولندیغم مدتجه سزی سومش، سزی قلبمک  
 بتون قابلیاتیه دوشونمش، آرامش اولان کمال زاده پی  
 گاه و بیگاه خاطر کزه کتیرسه کز روحی الی الابد بختیار  
 ومنتدار ایدرسکز؛ کلکیز قوماندان بک! بوشرفی  
 بندن دریغ بیورمیکز! یاشاسون عسکر، یاشاسون  
 حریت، یاشاسون وطن، پادشاهم چوق یاشا!

## سلانیکده ایراد اولنان نطق

هنوز اون بر یاشنده چو جوقدم. مدللیده بولنیور.  
 دق. آیاستفانوس وبالا خره برلین معاهده نامه لرینی  
 ایجاب ایدن محاربه هنوز ختام بولمش ایدی. استانبولدن  
 هفتده ایکی اوج کره بک مؤلم خبر لر آلیوردق :  
 مهاجر لر، پایتخته دولیور، جامع حایلیری، میدانلر،  
 قوناقلر خسته، بیچاره، علیل یوزلرجه، بیکلرجه  
 اولوم رنکی باغلامش، انسان قیافتنده جانلی جنازه لره  
 مقرر اولمش! بابام - شو بیوک وطنک عیناً بیوک قلبی  
 اولان شهید زار زار حریت - بواحوالدن فوق العاده  
 دلخون، صوک درجه لرده متأثر، علوی چهره سنه  
 عادتا اولوم رنکی انعکاس ایتمش، کوزلرنده ایکیمه  
 برده خونین سرشک تأثرات بلیریر، لسانی بر مهاجر  
 قیزی آغزندن سویلمش اولدیغی منظومه یی تکرار  
 ایدر طوروردی :

الله ایچون اولدیر بی

الله حفظ ایتسون سنی!..

بن اوزمانلر باباجغمک یانندن هیچ آیرلمق  
 ایسته من ایدم. کوچوک عقلمله، عاجز جسمله  
 اوزمان مدللیده کمالی آکلایه جق بر انسان موجود  
 اولدیغنی تقدیر ایدر کی ایدم ده او هیچی مدرکات

وحسیات ایچنده کمالک قلب وروحنی باری مونس  
 برچهره ایله ، لطیف بر نظر ایله ، اولاد محبتیه تسلی  
 ایتک ایستر ایدم . کندی یورکچکمهده مرکوز اولان  
 شوم مقصده وصول ایچون کیجه لری اویقومی ، چوجو قلق  
 اویقوسنی فدا ایتدیکی چوق بیلیرم !.. ایشته بویله  
 برکیجه بابا اوغل برکوشده حزین حزین اوطورورکن  
 اوده برکورولتی قوبدی : مردیونلردن عجله عجله  
 چیقیدیلر ، بولندیغمز اوطه یه اوج افندی کیردی .  
 بوذاتلر کیمدی ؟ اسملری نه ایدی ؟ شیمدی بیله م ؟  
 چهره لرینی ده کورسهم بلکه تمیز ایدهم ؛ کماله  
 هرکسک کوستردیکی مقتونانه انجذاب ایله اللرینه  
 صارلدیلر ، اویدیلر ؛ اوزمان لاقردیلرندن استانبوله  
 کیتمک اوزره ایکن اواقشام مدلی یه اوغرایان واپوردن  
 مرحومی زیارت ایچون چیقمش اولدقلرینی آکلادم ..  
 کمال نه دن بحث ایدر ؟ حضورینه کلنلر ،  
 کندیسنه نه سویله بیلیر ؟ درد وطن ، مرض ملت ،  
 مخاطره دولت بحثلری همان آچیلدی ! بن ، برکوشه یه  
 بوزولدم ، بتون قابلیت فکر و وجدانله جریان ایدن  
 مکالمه یی ؛ آکلامغه چالیشیور ایدم . اولا بابام سکوت  
 ایتدی . کلنلر سویله دیلر ، سویله دیلر ... آغلرلرندن  
 دوکولن "سلسله" عبارتدن ، طمطراق الفاظدن پک  
 ییزار اولان کوچوک ادراکم ، کوچوک کیله برابر  
 شونی پک اعلا آکلایور ایدی که بوکلنر ملتک آرتق  
 بیتدیکنی ، وطنک آرتق اولادینه صوک نفسنی

ویردیکنی، دولتک آرتق اضمحلاله یوز طوتدیغنی،  
بزم ایچون بر آتی قالمادیغنی، اوغراشمق، چالیشمق،  
حتی متأثر اولمق بیله اولدیغنی سویلیورلر،  
سویلیورلر، ادعا، اثبات اییدیورلردی.

مرحوم دیکلیدی، دیکلیدی، دنیاده یالکنز  
کندنده کوردیکم علوی برقهрман طور وحرکتیله  
یرندن فیزلادی. چهره سنده نورانی براحرار پیدا  
اولمش، کوزلرندن آتش صاچیلیوردی. عادتا میدان  
محاربه یه آتلمش عسکر کی مدعیلرینه هجوم ایتدی؛  
ادعالرینی چوروتدی؛ تاریخدن، فلسفه دن، حیات  
امدن بیکلرجه براهین ایله بوملتک، بو دولتک، بو  
وطنک مطلقا پایدار اوله جغنی اثبات ایلیور ایدی.  
بن، بو سوزلرک ماهیتی لایقیله، اطرافیه آکلایه.  
میور ایدم. فقط «بووطنک حیاته فرعونلر بیله قصد  
ایده مز. بوملتی شیطانلر بیله اولدوره مز» کی سوزلر  
روحه قدر عکس اییدیور. بنده، بنم کی برچوجوقده  
اوقدر تأثیرات علویه براقیور ایدی که؛ شیمیدی  
تصویرندن عاجزم. کان مسافرلر کمالک بو هجوم بلاغته،  
بو شدت محاکمه سنه قارشى برخیلی زمان مقاومت  
ایتدکدن صکره نهایت ملزم اولدیلر، یاخود ملزم  
اولمش کی کوروندیلر. واپورک زمان حرکتی  
یاقلاشدیغندن عجله ایله قالقوب کیتدیار. اوزمان بابام  
بکا دوندی،

ایلمش باق مکر که قارشیمده

مردم چشمی فلک تصویر

بیتله نه قدر سودیکنی کو سترمک ایستدیکنی اوغلنی  
الندن طوتدی ، یوزیمه حالا بو کون روحده اهتراز  
ایدن برنکاه محبتله باقدی :

— کل اکرم ، او طه مزه کیده لمده بو آدم لر نه  
سویل دیلر ، بن نه جواب ویردم سکا آکلاده ایم  
دیدی . ذاتاً بنمده اک بیوک املم بوایدی . مرحومک  
او طه سنه چکلدک ، اوراده بکا دیدی که :

— او غلم اکرم ، بو آدم لر ، شیمدی شورادن کیدن  
حریف لر وطنک اوله جکنی آرتق دیر یله میه جکنی ،  
ملتک باته جغنی ادعا ایتدیلر . بوندن امین اولمشلر ،  
هیچ بر چاره یوقش ، هیچ بر امکان بولنه مازمش !  
محاربه ، جاسوسلق ، شیطانلق ، ملعونلق ، اخلاق سزاق  
عثمانلی ملتنی یمیش بیتیرمش ، کیمکیرینه قدر اتمش ،  
آرتق بزده قان ، جان قالماش ؛ ایشته بویله بیوردیلر !  
حکمت فروش آغالر ... لکن او غلم ، بونلر بورننک  
اوجنی کورمن حریف لر در ، سوزلری هذیاندر ،  
بدالقدر ، حیوانلقدرد . عقلک ایرمنر دها کوچوکسک ،  
سکا شیمدی اثبات ایتکه قالدیشسه م آکلایه مازسک ؛  
شو قدر نی سویله ایم :

بابا که اعتمادک واریا ! بو وطن اولیه جکدر ، بو  
ملت کندینی قورتاره جقدر ، حریتنی آله جقدر .



کیم نه دیرسه دیسون ، سن اینامه ، سن بکا اینان :  
 وطنمزك آتیسى امیندر ، البته برکون کله جك بزم  
 وطنمزدده ملت حاکم ، حریت پادشاه اوله جقدر .  
 بوکونی بلدکه بن کوره میه جکم اکرم . . . . ملنک بو  
 عید سعادتنه بلدکه بن قاووشه میه جغم . . لکن سن  
 کوره جکسک . . . سن عثمانلی ملتنک کندی حریتنی  
 چکه رک ، سوکه رک ، قوپارهرق آلدیغی کوره جکسک .  
 او زمان بو ملت معظمه باباک کمالک روحنی تقدیس  
 ایده جکدر . سن ده ، ملتکی تقدیس ایت اوغلم ؛ حیاتکی  
 وطنکه فدا ایتمکن هیچ بروقت چکینمه . . . . کمالک  
 اوغلنه یاقیشان بودر . لوای حریتی طاشیه جق  
 اولانلردن بری ده سنسک اکرم ! ملتنک حضورینه  
 آلنک آچیق اولهرق چیق ، تا که بنم ده روحم  
 آخرتده شادان اولسون . . . . .

ایشته بن قدسده ۱۱ تموز تلغرافنامه سنی آلدیغم ،  
 سلطنت حریتک تقریرینی اوکرندیکم کون مرحوم  
 بابامک شو سوزلرینی عیناً ، حرفیاً تخطر ایتدم ،  
 عهدمه نه بیوک بر وظیفه ترتب ایتدیکنی درحال  
 آکلادم . اوکوندن بوکونه قدر بو وظیفه یی ایفا ایله  
 اوغراشیورم . سلانیکه ، ملتنک قابکاهنه ، سنک آره کزه  
 کلمکدن مقصدمده وظیفه حیتمی ایفایه چالیشمقدن  
 عبارتدر . بن بوملتک مال موروثییم ؛ وجود و حیاتمه  
 تصرف ایتک ملتنک حق مقدریدر ؛ بابامک وصیتی ،

امری ده بودر. مرحومك هيچ بر رأینده یا کمدیغنه  
ایشته بوکون شو عالم جوشا جوش حریت ملت قدر  
برهان جلی اوله ماز. حقمده ۱۱ تموزدن بوکونه  
قدر هر بولندیغم، هر اوغرا دیغم یرده کوستریلان  
فوق العاده حسن قبول وبالخاصه بوکون شو محترم، شو  
عالی همت سلانیک وطنپرورانی طرفلرندن ابراز اولنان  
آثار قلبیه محبت و اخوت اک زیاده، ایشته او هیچ بر  
رأینده یا کلیان، ملتک بوکونکی بختیار لغنی، بو  
کونکی شان و اقبالنی صورت قطعیه ده کشف و تخمین  
ایدن شهید حربت کلاک روخنه عأددر. بن شیمدیکی  
حالده ملتعه لکه سز بر ماضیدن باشقه هیچ بر شی  
عرض ایده میورم. احرار عثمانیانه بر پارلاق آتی ده  
کوستره بیلمک ایچون ینه بنی بوملتک خدمتیه مکلف  
طوتان، وجدانمه حسبیات حریت و حمیتی اک متین  
بر صورتده یرلشدیرمش اولان او مرحوم مقدسک  
روحندن استمداد ایدرم. شاهراه حمیتده موفق  
اوله بیلمک ایچون برده بوکون شو حریتی استحصاله  
موفق اولان، وطنی، ملتی، دولتی بر موت محققدن  
قورتاران شانلی، قهرمان عسکر لریمزک، و هر زمان محب  
کمال و حمیت اولدیغنی هر شیئه رغماً اثبات ایدن بیوک  
عثمانلی ملتک اخوتنه، معاونتنه صیغنیرم.

یاشاسون حریت، یاشاسون وطن، یاشاسون ملت،  
یاشاسون اردو!





## عثمانلی عسکرینه ! [\*]

کوروب بنیان ملکی منقرض ظلم و دناشتدن ،  
بویوک بر نوحه قویدی قلب آتشیبار ملتدن ،

او فریاد مهپیک شدت تأثیر حاریله  
بوخا که ابر رحمت دوشدی وحدتگاه قدرتدن ؛

حمیت جوشه کلدی ، شمس حریت ظهور ایتدی ،  
بوارق قایلادی آفاقی شمشیر جلادتدن !

او شمشیر جلادت ، سیف نورانور عثمانی  
ویرلمش عسکره دست ازل تاب مشیتدن ؛

او شمشیر جلادت ، همت عالم پسندیله  
جهانگیرانه بردولت چیقارمش بر عشیرتدن !

او شمشیر جلادتدرکه فیض اعتلاسیله  
طولار تاریخ ملت افتخار قلب ملتدن ؛

او شمشیر جلادتدرکه بر نیم انجلاسیله  
جهان ظلمی تیرتمشدر آفاق حمیتدن .

[\*] سلائیکه و استانبولده اویناتیلان « وطن » تیاتروسونده  
وقوع بولان دعوت اوزربنه انشاد ایدلمشدی .  
للطابع

لوامع ریز دهشت اولمادن قهر عدو ایتدی ،  
 صفوف ظلم واستبدادی بوغدی خوف وهیبتدن !  
 نه در بر آیدن اول وجه ماضی ؟ قانلی بر صفحه ،  
 ملوث عالم جست که جان بولش خیانتدن ؛  
 دنائت ، افترا ، آچقلاق ... اک ماعون ... بدطینت ،  
 عقور اجلاف خلقت مستقید اولمش حکومتدن ،  
 سوروکلرلردی ملکی ، دولتی ، هر درلو آمالی ...  
 قویارملرلردی حسیاتی قلب آدمیتدن ؛  
 سوروکلرلردی تا عمق فنایه بر جهان خلقی ،  
 نه خوف الله قهرندن ، نه غم عار ملامتدن ؛  
 بوغوق بر نوحه کلزردی فانی مظلمدن ،  
 وطن بر مقبر احیایه دو نمشدی سکونتدن ؛  
 بتون اصحاب وجدان زار زار ظلم ایدی اما ،  
 فغان ابکم قالیردی تیره یوب جان یأس و حیرتدن !  
 چهار اقطار ملکی ایلوب احرار ایچون منفا ،  
 حکومت اولدوریردی فیکری ذلتدن ، سفالتدن ؛  
 چکوب آغوش لوٹ و ذلته ملعون جاسوسان ،  
 قویارمق ایستیوردی ورد حسنی وجه عصمتدن ؛  
 تعرض عرض و ناموسه ، تعرض قلب و وجدانه ،  
 تعرض عقل و ادرا که اولوب اسباب ثروتدن



نه جانلر ياندى ، قانلر آقدى ، مأوالر خراب اولدى  
نه مسكنلر ييقلدى جوشش سيل سفاقتدن !

شهيدان حميت بلكه اون بيك فرده وارمشدر ،  
وطن محروم اولوردى بلكه يوز بيك مرد غيتردن !

بتون ارباب ناموس التجا ايتمشدى اللهه ،  
قارارمشدى جباه ملت ادبار وحقارتدن ؛

چوجقلر آغلار ، ايكلر آنهلر ... بيجاره مظلومين  
طويارلردى بو مدهش ناله يي زندان غيبرتدن ؛

قلوب خلقه بيك خنجر اينردى ظلم وشدتدن ،  
بروج حقه بيك فرياد اوچاردى قهر وضجرتدن ؛

بتون ممنوع ومستقل ، معقب ، مهمل اولمشدى  
نه طويسه ق قلب ووجوداندن نه بولسه ق عقل وفكرتدن ....

عطالت محض حكمت ، خدمت ملت جنائيتدى ،  
عبارت هر فضيلت لفظ ملعون صداقتدن !

صداقت ... آه اى فكر لئيم دور استبداد ،  
صداقت ، اى مؤدل ملامت ! سن علم وحكمتدن ،

ذكاوتدن ، دهادن ، قلب وحسدن هر نه بولدكسه  
همان عد ايلدك اك مبتذل ، عادى جنائيتدن !

جنائيت ايشلدك يازدقچه ، باقدقچه ، كورندكچه ،  
جنائيت ايشلدك قاجدقسه بر دم خواب غفلتدن !

وطن . . . . مجروح و گریان ! برانین محترز ، ممدود  
چیقوب آهسته آهسته بو فسحتزار محنتدن ،

ایرزدی عالم ارواحه ... تا عرش الوهیت  
الیم اولمشدی آرتق نوحه روح نبوتدن ! . . . .

نهایت ... ای مظفر ، شانلی اردو ! سن ظهور ایتدک  
فیوض عدل و حق جوش ایتدی آفاق سعادتدن ؛

نه علویدر مقدس مقصدک ، جهد سماشانک ،  
بتون بر خالق قورتاردک کلاب ظلمه خدمتدن !

دینلر وار که : عسکر قوتسنددر هر استبداد ،  
آلیرمش روحنی ظلم حکمداران بو قوتدن . . . .

بووهمیاتی سن محو ایلدک ، ای شانلی اردو ، سن ،  
سن استبدادی آلدک نیچه خونریز دولندن ،

باتیردک ، اوردک ، احیا ایلدک ! . . . الله ایچون عالی ،  
مقدسدر جهادک کائناته غالیبتدن !

اوت ، مغلوب تیغک شمدی بر دنیای استبداد ،  
کلیر پایکده تیرر بر جهان خوف و مهابتدن !

غزای اکبرک ای جند عالی فیض عثمانی  
بیوکدر لفظ و معنای جلادتدن ، شجاعتمدن ؛

بیوکدر شان ماضیدن بیوکدر فیض آتیدن ،  
بیوکدر فتح عالمدن ، بیوکدر فکر امتدن !